



Alþingi
Efnahags- og viðskiptanefnd
Austurstræti 8-10
150 Reykjavík

Reykjavík, 31. maí 2022

Efni: Umsögn um frumvarp til laga um peningamarkaðssjóði, mál nr. 570.

Samtök fjármálafyrirtækja (SFF) hafa tekið framangreint frumvarp til skoðunar. Í frumvarpinu er lagt til að innleiða í íslensk lög ákvæði reglugerðar Evrópuþingsins og ráðsins (ESB) 2017/1131 frá 14. júní 2017 um peningamarkaðssjóði.

SFF gera ekki athugasemdir við að frumvarp þetta verði að lögum en vilja koma á framfæri athugasemdum við umfjöllun í greinargerð með frumvarpinu þar sem ýjað er að því að til staðar séu sjóðir á íslenskum sjóðamarkaði sem mögulega falli undir skilgreiningu peningamarkaðssjóða samkvæmt reglugerðinni sem til stendur að innleiða.

Í greinargerðinni segir:

„Á íslenskum sjóðamarkaði eru reknir sjóðir sem munu mögulega falla undir skilgreiningu peningamarkaðssjóða samkvæmt reglugerðinni. Rekstraraðilar slíkra sjóða munu þá þurfa að óska eftir staðfestingu sjóðsins hjá lögbæru yfirvaldi, enda mun ekki vera heimilt samkvæmt reglugerðinni að reka sjóði sem líkjast peningamarkaðssjóðum án slíkrar staðfestingar. Einnig munu rekstraraðilar slíkra sjóða þurfa að uppfylla þær kröfur sem gerðar eru til peningamarkaðssjóða samkvæmt reglugerðinni, svo sem þær sem gilda um mismunandi tegundir peningamarkaðssjóða.“

Af þessu tilefni skal það tekið fram að í dag eru engir sjóðir reknir á Íslandi sem mögulega geta fallið undir skilgreiningu á peningamarkaðssjóði. Samkvæmt upplýsingum frá stærstu rekstrarfélögum sjóða hér á landi, sem eru aðilar að SFF, er nánast útilokað að slíkir sjóðir verði stofnaðir, að minnsta kosti ekki í íslenskum krónum. Það helgast annars vegar af því hversu fáum útgefendum er til að dreifa og hins vegar af því hvert framboð af hæfum fjármálagerningum er. Í greinargerð með frumvarpinu er skýrt tekið fram að peningamarkaðssjóðum sé einungis heimilt að fjárfesta í þeim eignum sem taldar eru upp í reglugerðinni og aðeins að uppfylltum þeim skilyrðum sem þar er kveðið á um. SFF þykir rétt að benda á að ekki er boðið upp á bróðurpartinn af þessum eignum á mörkuðum héraendis, t.d. hvað varðar hæf innlán og innlánskírteini í skilningi reglugerðarinnar. Það er þó ekki útilokað að settir verði upp peningamarkaðssjóðir í evrum eða öðrum erlendum myntum þar sem til staðar eru útgefendur og framboð

verðbréfa er meira en gildir um fjármálagerninga í íslenskum krónum. Þegar og/eða ef af því verður er vissulega gott að hafa þessa löggjöf til staðar, opnast slík tækifæri.

Í frumvarpinu er nefnt að mögulega kunni svonefndir lausafjár sjóðir að standa næst því að geta talist peningamarkaðssjóðir. Staðreyndin er sú að þeir sjóðir eru verulega frábrugðnir peningamarkaðssjóðum og er eignasamsetning þannig að stærstur hluti eigna þeirra er af öðrum toga en teljast hæfar eignir samkvæmt umræddri reglugerð. Af markaðsefni lausafjár sjóðanna að dæma virðast þeir hvorki vera að bjóða upp á ávöxtun í samræmi við tiltekna peningamarkaðsvexti eða með yfirlýst markmið um að vernda virði fjárfestingar, sem eru einkenni peningamarkaðssjóða og forsendur þess að falla undir reglugerðina. Það verður því ekki séð að þessi fyrirhugaða löggjöf hafi nein áhrif á þá sjóði sem fyrir eru á íslenskum sjóðamarkaði.

F. h. Samtaka fjármálafyrirtækja.

Með vinsemd og virðingu,



Jóna Björk Guðnadóttir, yfirlögfræðingur